

貴池縣志卷二十

知貴池縣事陸延齡重修

人物志

官績上

唐

胡楚賓秋浦人高宗時為右史與諸儒論禁中奉勅同撰百僚新戒等書其為文甚敏酒酣揮灑自如高宗嘗以金銀杯斟酒飲之文成輒賜焉家居率沈飲無留賜費盡復入得賜而出以為常然性重慎未嘗洩禁中事人及其醉問之亦熟視

貴池縣志

卷三

人物志

官績上

一

不答尋兼崇賢直學士以其與機密故時號北門學士而豪邁自負當時以李白匹之謠曰前有胡楚賓後有李翰林詞同三峽水字值萬黃金卒葬秋浦杉隄院府志

顧雲字垂象秋浦人初與杜荀鶴殷文圭同讀書九華山有文名與羅隱俱受知於宰相令狐絢隱鄉音乖刺雲風韻詳整絢子弟獨與雲遊咸通十五年登進士第會世亂退居雪川以著書為事執政薦修國史與盧知猷陸希聲司空圖錢翊馮渥輩同奉勅撰宣懿僖三宗實錄時稱直筆雖權貴不敢以私干書成加虞部員外乾甯初卒江南通志

殷文圭小字桂郎少讀書九華山苦學所用墨池底爲之穴唐末請託公行文圭與游恭獨步場屋乾甯中昭宗幸三峯文圭攜東平王全表薦及第尋爲裴樞宣諭判官至汴全忠復薦之旣而文圭投啟於公卿曰於菟獵食非求尺璧之珍爰居避風不望洪鐘之樂及南歸爲多言者所發全忠大怒遣人捕之不及屢言措大率負心每援文圭爲證時甯國節度使田頴雅重儒士置田宅迎文圭母以甥事文圭頴死事吳太祖掌書記太祖墓誌銘出其手武義元年拜翰林學士一云終左平牛衛將軍有登龍集十卷從軍稿二十卷冥搜集二十卷先

貴池縣志

卷三

人物志

宦績上

二

是文圭道遇老叟目久之謂人曰若人眉綠拳必入口後顯名當時果符其言又嘗經大澤中驟雨震雹眾駭躡文圭如不聞雨定傍人見其兩耳中鬼神以泥封之其異徵如此子

崇義仕南唐爲宰相

見十國春秋並通志府志

按唐詩紀事稱文圭不應朱全忠錢鏐辟當無攜表及第事又云登第卽南歸當無宣諭汴州事劉城嶧桐集辨之綦詳文圭墓在貴池之殷村唐書以爲西華人誤又唐詩紀事云文圭途遇一叟鬚白眉綠拳可入口神仙狀也曰子如學道當沖虛爲儒當有大

名於天下與此差異

南唐

伍喬幼學詩聲調寒苦有瘦童羸馬之歎遊廬州忽一夕見一巨掌書讀易二字自牖中入示之喬悟遂精易旨保大十三年試畫八卦賦舉進士第一人詔令刊喬賦於國學門以式多士初判歙州召入爲考功郎中又嘗爲戶部員外郎乙亥冬命喬於圍城中放孫確等三十八人及第南唐亡隱九華山以終著有蜀花蕊夫人諸傳詩一卷

十國春秋

殷崇義文圭子少見飛星墮水盤中掬而吞之文思日麗仕元

貴池縣志

卷三

人物志

宦績上

二二

宗官至學士歷樞密使右僕射嘗撰揚州孝先寺碑周世宗親征淮南駐蹕於寺讀其文嗟歎久之及畫江請平元宗使崇義入貢世宗待之有加禮自淮上用兵凡書檄教誥皆崇義任之特爲典贍切於事情周世宗覽江左奏章輒擊節稱賞元宗遷南都命以樞密使與嚴續輔太子留守金陵後主初立令民間行鐵錢物價騰涌崇義上言泉布屢變亂之招也豪民富商不保其貲則日益思亂累數百言不報未幾進右僕射同平章事已而改官名以司空知左右內史事國亡入宋避宣祖諱易姓名曰湯悅宋太宗勅撰江南錄十卷自

言得陳壽史體世頗稱之是時諸降王死多出非命其故臣或宣怨言太宗俱錄之館中俾修太平御覽豐其廩餼書成晉金紫光祿大夫上柱國陳縣男食邑三百戶

十國春秋

宋

夏中正南唐諸生入宋知貴池縣以鄉黨不可加刑每聽訟隨曲直諭戒之使無犯法人多化而遷善尋擢職方員外郎告歸卒孫噩舉才識兼茂科知長洲縣以直罷文彥博奏復其

官

江南通志

樊知古字仲師祖知諭本京兆長安人吳時爲金壇令父潛南

貴池縣志

卷三

人物志

宦績上

四

唐爲石埭令遂家於池知古沈雄有大略舉進士不第因謀歸宋乃釣於采石江上每月夜乘小舟載絲繩維南岸疾棹抵北岸以度江之廣狹開寶三年詣宋上書言江南可取狀請造浮梁以濟師太祖令試學士阮賜本科及第授舒州軍事推官七年召拜太子右贊善大夫會王師征江南知古爲鄉導下池州八年命領州事先是州民據險拒宋知古擊之連拔二砦擒其魁餘皆潰散時曹彬爲西南路行營都部署自荆南發戰艦東下潘美爲行營都監率步卒出淮南渡江或謂江闊水深從未有以浮梁濟者知古乃先於池州石牌

口試造之移置采石三日而就不爽尺寸潘美遂率步卒渡江若履平地江南平擢侍御史令按行江南訪詢利病尋授江南轉運使賜錢百萬李煜用兵權宜加斂知古悉奏爲常額江南諸州官市茶十分之八復征其餘然後給符商人苦之知古請蠲其稅仍差增所市之直以便於民江南舊用鐵錢十當銅錢之一物價翔躍民不便亦奏罷之太宗卽位授庫部員外郎換金紫賜錢百萬太平興國六年加虞部郎中改知邠州移鳳翔府入爲鹽鐵判官出爲荊湖轉運使雍熙初遷北部郎中改東路轉運使遷駕部郎中賜錢五十萬知

古本名若水字叔清上召見問卿名出何書對曰唐尚書右丞倪若水亮直臣竊慕之上命改名知古端拱初遷右諫議大夫河北東西路都轉運使賜白金千兩兩路各置轉運副使都轉運使之名自知古始二年加河北西路招致營田使奏請修城木五百餘萬牛革三百萬上以所議過當恐困民詔有司量以官物給之會度支使李惟清上言河北軍儲無備請發河南十七軍州轉粟以赴太宗以農事方殷難之遣左正言馮拯與知古計之知古言河北軍儲可以均濟應俟農隙令民轉餉未幾拜給事中改爲戶部使知古有才力累

任轉運甚得時譽及任戶部職事不治詔書切責素與參知政事陳恕善太宗與恕言知古乖違事恕以告知古見上自解帝知恕泄禁中語兩罷之改西川轉運使鬱鬱不得志卒真宗猶憫之賜其子漢公學究出身宋史

按志例紀美不紀惡漆志全抄宋史多指斥語今節

刪之新纂

湯允恭悅之後登宣和六年進士第判常州常素稱難治允恭以訓誡先之俗漸以化適鄰州有叛卒轉掠城邑將及常允恭單騎詣賊營曉以禍福寇即解去州城獲全擢刑部員外

貴池縣志 卷三

人物志 宦績上 六八

郎多平反冤獄再擢殿中侍御史兵部侍郎歸老齊山萬姓統譜

並府志

湯巖起允恭姪乾道六年進士第知營道縣以廉稱常自勗曰廉而死豈不愈於墨而生耶秩滿歸葺寶峰小圃閉戶著述

為終老計以薦起判徽州即奉祠還里萬姓統譜 並府志

葉楠字元質父蒼有孝行楠登乾道中進士第為鄱陽尉值歲

潦楠力請蠲租恤之後為績溪令多惠政邑人歌曰前有蘇

黃門後有葉令君蘇黃門者蘇轍也當時清望相等萬姓統譜 並府志

志

張榷字伯器父洵爲獄吏遇冤繫輒籌所以出之者得則飯不得則寢不安榷亦篤於孝友入仕能理繁劇迭知鳳翔徽安數大邑以事忤蔡京徵至京師卒於途京疑其詐欲發棺檢視賴同里高允文力保乃免

江南通志  
並府志

高允文初爲清流主簿以力救張榷不發棺蔡京多其義授定邊軍教授擢知汀州治尚廉靜及歸蕭然襤被時稱長者

江南通志

通志孝  
義傳

明

李賢洪武中以貢授蘄州學正陞都督府斷事坐事編伍營州

貴池縣志

卷三

人物志

宦績上

七

左屯衛尋薦爲兵部郎中陞陝西布政司左參政又坐事編伍興州左屯衛尋又薦爲監察御史陞左中允出爲雲南按察司僉事屢進屢退喜愠不形有古君子風焉

府志

桂林字宗衍洪武二十年貢入太學授刑部主事未期年遷員外同邑方濬陷獄罪議戍林廉其冤釋之後濬爲廉吏官至布政司參議初與黃侍中觀同遊邑庠甲戌秋林服闋赴京供職時觀亦在籍爲詩并序送之稱林曲盡事親之道鄉黨閭里咸稱其孝及居官公清勤慎凡所讞獄悉得其平推服甚至洪武末以直諫下獄死

秀山志

方濬字孔哲洪武十七年以府貢入太學授廣東高安典史守令以上皆才之薦擢刑部主事時雲南孟棟諸番梗化屢害使臣成祖不欲勤兵於遠仍欲撫之以濬充使諭以順逆之理大小之勢番人讐服入貢復命稱旨擢禮部員外郎十六年又奉勅撫雲南貴州湖廣苗民咸奉教令宣德二年陞廣東布政司參議後致仕歸在官三十年家無厚積

府志

夏遵道字尖山幼通五經工書翰與黃侍中觀爲姻婭洪武閒以儒士薦爲池州府學教授能訓士建文卽位黃觀欲薦爲講官不可靖難兵起觀草詔詆斥成祖遵道遺之書曰燕人

貴池縣志

卷三

人物志

宦績上

八

高皇不能殺青田不能治天意有歸不可難也及成祖入南京觀死江上收觀姻戚僅罷遵道官不加罪遂隱尖山侶漁

樵以卒

府志

按池陽考古類編載觀答遵道書層層駁斥此必遵道事後僞作藉以脫罪耳觀國之大臣遵道雖姻戚敢遺之書使貳於叛藩哉其爲僞書無疑而卒以此自全亦明哲保身之士矣

余鐸洪武中官安仁主簿邑有流亡逋負鐸奏撥茶陵屯糧籌補民稍安集任滿當代父老數百人詣闕乞畱遷知本縣益



多惠政

湖南通志

舒仲誠建文初以貢授東光縣訓導陞江西萬載知縣政尚嚴明頑梗向化擢監察御史時成祖親征北庭仁宗以皇太子監國仲誠言事忤旨銜之未幾出爲湖廣按察司副使仁宗卽位欲以前事罪仲誠楊士奇諫曰昨有詔悉貸罪臣今追治仲誠是明詔不足信於天下矣仁宗喜賜士奇白米彩幣寶鈔而貸仲誠仲誠自殫其職無懼色宣德中致仕卒

江南通志

並府志

吳必聞永樂初舉人授湖廣潛江縣教諭宣德中遷北國子監

貴池縣志

卷三

人物志

宦績上

九

學錄克舉其職謹言慎行古道自持諸生化之

州志

孫仁字世榮幼有器識敦孝友親疾禱以身代兄弟九人情愛

均至至老無閒言正統十二年舉應天鄉試景泰三年成進士觀政戶部奉命稽考永平山海關邊儲回奏稱旨賜白金明年授戶部主事丁生母憂服闋補工部主事提督濟甯等閘尋又改戶部督畿內糧儲監京倉釐夙弊戶部尚書章鳳都御史軒輓特重之天順七年出爲四川順慶知府丁嫡母艱服闋改陝西西安府成化四年固原有羌寇朝廷遣大兵討之仁以轉餉功優詔獎諭九年遷陝西右參政修沿邊斥

堠鑿涇陽之洪口堰引水灌田民受其惠十二年遷本司右布政使數歲不登流民聚漢中荆襄閒將爲亂仁悉力安撫奏設白河等縣令就近著籍以解散之十三年轉左布政使十四年晉右副都御史巡撫四川繼張瓚之後瓚屢著戰功仁簡易持重每增關隘嚴守禦以防羌蠻未嘗大用兵惟平松藩黑虎等寨然皆先諭降其眾而賊首白眉毛等猶拒命勒兵勦捕焚其寨而還又火掌壩諸番阻絕糧道乃請出師會有擒其渠以獻者師亦旋罷番漢並安戰功不多而名與瓚等茂州平降勅獎勵并陞賞其將佐傅泰堯或等有差仁

迺相地險要爲設州縣或陞縣爲州以控制之十六年敕慶諸郡災仁發官帑賑之民賴全活城東有學士宋濂墓爲水所齧仁改葬高原且存省畱蜀後裔十九年仁以蜀久晏安上疏引退適秦中大饑朝議以與蜀鄰非仁不足撫輯特詔勉畱撫蜀八年成化二十三年召爲戶部右侍郎二十四年冬乞骸骨還里晉一級明年秋卒年七十諭葬貴池義和社畱佳山九公隴之原楊廷和爲之狀劉宣基志銘其墓子二鉉廕國子生鏞廕補光祿寺署丞

江南通志  
並府志

章瑩天順三年舉人授湖廣襄陽知縣不阿上官歲餘卽歸自

號閒閒散人足跡不入公府知府陳良器重之嘗馳簡約遊齊山瑩辭以詩有山前邀飲應憐我醉後扶歸卻倩誰之句卒祀鄉賢兄璧文章與瑩齊名由舉人授東流縣訓導改台州府學訓導勤於課士兩地化之遷湖廣宜章知縣有廉名致仕後猶賣文自給

府志

張廷瑞天順時舉人授江西龍泉縣知縣以清惠稱滿九載擢南京山東道監察御史清理屯田籍中人侵占田畝還之軍在官十三載致仕歸無以自給龍泉人復迎之至縣居三載始歸不受贖縣人爲立卻金亭在里與許侍御潛同遊山水

貴池縣志

卷三

人物志

宦績上

十一

並稱風雅陳知府良器稱爲二老年八十九卒

江南通志

桂甯字清軒景泰七年舉人授湖廣臨武知縣訓士衛民百廢

具舉三年以最當遷邑人詣闕乞留復任三年陞雲南安甯知州州民夷雜處甯明白開導悉爲感化兩地皆祀名宦丁外艱歸遂奉母不復出子經知雲南霑益州偶不當意輒撻之其嚴毅又類此經見忠節傳

府志

許潛成化中進士授行人選爲監察御史奉命查內庫中貴憚之言事剛正不阿宏治中致仕歸

江南通志

丁瑤字德良成化中以貢授山東鄒平縣訓導改湖廣興國州

訓導訓士不倦清俸悉助貧生有譚魯者窶甚瑤爲之婚且卜宅焉後瑤歸老於家魯以御史官南京便道拜牀下府志

姜淵字希賢成化中歲貢任安遠知縣每議重辟流涕減食致

仕歸里士民攀轅采訪冊

周冕字尚文宏治初由進士授南戶部主事擢員外郎監稅鳳陽清夙弊又督理江西糧儲得實糧四十萬石蠲負幾百萬

石綜理維精操持罔玷下詔褒之閱十五年歸江南通志

趙麟成化十四年歲貢宏治中知遂安縣嘗令民輸粟贖刑比

九年積粟九萬石後歉歲賴以存活者甚眾一統志

貴池縣志

卷三

人物志

宦績上

十二

李嘉祥字時鳳性穎敏日記誦數萬言宏治中由進士授北直開州知州善剔奸弊吏民畏服勤於教士作尊經閣於文廟後環列書舍三十楹宿諸生於其內嚴其程課城北舊有疙疸廟婦女燒香極誣誕嘉祥毀之巫風遂絕擢南戶部員外郎督賦蘇州條陳利害語侵權宦人皆危之嘉祥自若祀開

州名宦

見開州志並江南通志

桂鏊字用之宏治十一年舉人正德中授江西廣西府同知時宸濠畜逆謀結山中三巨寇爲支黨巡撫孫燧檄鏊以次勦平之蒙嘉獎尋去官嘉靖初補廣西柳州府同知適尚書王

守仁總督兩廣諸軍平思州斷藤峽鏊與軍事論功擢思恩府知府思恩有猺獞八寨每相攻劫鏊至郡與文講武以威信孚之夷民以戢致仕後粵人祠王守仁以鏊配

廣西通志並江南通志

志

孫溥字博之倣能文宏治十一年舉應天鄉試選湖廣通山

知縣廉節自持不諧俗一日謁監司問其齒出即請老歸益

肆力於詩古文凡碑版文字多出其手姪桴舉隆慶元年應

天鄉試授浙江甯海知縣亦以狷介著

溥見一統志桴見府志

汪珊字德聲正德六年進士授監察御史嘉靖元年上疏曰臣

貴池縣志 卷三

人物志

官績上

十三

竊觀正德之末閹監當朝天下嗷嗷困於束濕沸湯之中人

人思得新主陛下登極一詔渙然嘉興宇內更始初政之美

如日方升無一不快愜中外臣民之心而其間最有關於國

體民生者大約有十今兩閱月以來雖未盡改化易絃而其

閒稍稍漸不如初者亦大約有十初事每獨斷今戚里左右

或得以潛移陰假其漸一初事每咨訪大臣今禮貌雖隆而

日益疏遠其漸二初罷諸不經淫祠今乃稍稍議復其漸三

初屏絕玩好今教坊或得以新聲雜技進其漸四初躬覽章

奏今或忽而不親輒憑左右可否其漸五初冗食冗員痛議

裁革今騰驤勇士不行覆實是爲冗食御馬實數不得稽察是爲冗費其漸六初裁革錦衣冒濫今大臣近侍以迎立封爵錦衣世廢藩邸旗校盡補親軍冒濫如此其漸七初中官有罪懲以正法今一二犯法舉朝論之卒貸死而罰金後將何懲其漸八初中官有過者皆不得任用今鎮守守備稍稍營換倖門復起其漸九初納諫如流今政事不便者直批不准奸罪未正者直答有旨所謂訑訑拒人者此也其漸十聖明如陛下其悠久無疆之精神直將配天行健豈其甫兩閱月而遂漸不如初至此臣慮聖德或蠱於近習國是或淆於

羣議竊抱杞人之憂偶窺其端遂慮其委輒敢冒死以陳疏上不報時有言官吏道已擢僉事論奏大學士楊廷和辭過激直兵部尚書彭澤疏救廷和遂指科道爲奸黨自後言者必會本始准上陳珊請遵成憲開言路疏曰近兵部尚書彭澤因罪新陞僉事史道論奏大學士楊廷和而波及於臣等科道竊謂此言路開塞之機社稷安危之端所言甚重不敢不爲陛下陳之昔唐憲宗問宰相李絳曰比諫官多朋黨論奏不實欲黜其尤者若何絳曰此非陛下意僉人以此熒惑聖心自古納諫昌拒諫亡君尊如天臣卑如地加以雷霆之

威人臣進言於上干不測之禍顧身無利耳今乃欲摧抑之非社稷福也憲宗曰微卿言朕不知諫之益憲宗初雖誤於聽聞及聞李絳之言幡然改悟遂成中興令績臣主俱美光昭史冊誠爲可尚大抵言路開則人情通而世治社稷以安言路塞則人情鬱而世亂社稷以危此理勢必然不待智者而後喻也陛下繼統之初發明詔首開言路崇獎直言之臣天下忻忻望治澤荷陛下眷遇之隆素負一時之望臣等將謂澤必導陛下以堯舜三代之盛祖宗成法在所必遵不意反導陛下以拒諫之計夫史道論奏楊廷和言之是非難逃

聖鑒就使其言狂妄此特一臣之失耳夫懲羹者不必吹壘畏噎者不可廢食澤乃欲因此壅塞言者之路沮壞祖宗之法使科道官類不得風聞言事臺諫之氣自此而沮循默自此而起其爲壅蔽之患豈小小耶伏望仍遵祖宗朝故事許科道官各敷陳所見不復拘會本以自阻塞則言路開而人情大慰風聲動而治化日隆矣時皆服其敢言俄外轉爲河南按察司副使擢浙江按察使廣東右布政使陝西左布政使旣乃晉都察院右副都御史巡撫湖廣復以言事落職會貴州凱口賊作亂廷推起珊往平之復原官加二品俸俄召

爲南大理寺卿晉南戶部侍郎卒於官珊生平自持清介布素肅然卒之日囊無遺貲朝廷爲給傳歸其櫬諭葬祭祀鄉賢子九仍以父廕官運判孫士元嘉靖四十年舉人官玉山

知縣

見明史列傳並府志

柯相字元卿正德十二年進士授江西永新知縣宸濠反南昌巡撫王守仁與吉安知府伍文定從上流舉兵討之相集其縣民兵從宸濠平守仁與以首功六級不受後以憂去服闋補山東商河知縣歲饑設法以賑多所全活擢南京兵科給事中改吏科奏裁內府暨諸司庫藏以鉅萬計尋擢浙江按

貴池縣志

卷三

人物志

宦績上

十六

祭使遷左右布政使晉都察院右副都御史巡撫陝西築皋蘭邊牆三百里墩臺相望邊警以絕改撫河南又改督兩廣不赴告歸卒諭葬祭祀鄉賢子一鵬字汝程嘉靖中歲貢事繼母以孝聞撫幼弟孤姪極慈愛析產自取礪确由浙江嘉興縣丞遷四川蘆山知縣縣中苗民雜處叛服不常一鵬撫綏備至四境帖然遷廣信府通判未抵任卒

相見江南通志一鵬見府志

李崧祥號密巖正德九年進士授戶部主事管倉徐州擢山東按察司僉事備兵青州尋遷山西按察司副使備兵潞安嘉靖十三年遷河南布政司參政將行適上黨青羊山賊作亂



山西撫按以崧祥有辦寇才特畱總四道兵馬尅日入山勦賊賊平議析壺關等縣地剗立平順縣以扼山之要害得旨允行賜銀幣而後赴大梁朝論壯之十四年春晉浙江按察使未幾晉江西右布政使轉四川左布政使時世廟多營建采取川中巨木山谷騷然崧祥因入覲抗疏曰臣聞制治於未治之先則其治可長保安於已安之後則其安可久故雖極治安之世亦當不忘乎儆戒之辭臣濫膺藩司職任民牧目擊川民深罹采伐大木困苦財敝於征求力竭於工役連年不得休息流離漂散莫能安養心實惻然又現奉雲南撫

按檄爲征安南坐取本省造戰船匠作駕船水手各數百名民間訛言傳播波及之患殆不止此調遣飛輓必將漸至兵戈相尋室家莫保小大皇皇思欲奔逸且近捧敕諭又示改大祀殿擇日興工民間茲工繼興又覺益增困苦驚惶無措蓋恐大木復派采辦難免竊思民患所在該臣牧職掌所關豈容坐視不爲上陳仰惟皇上敬天之誠尊祖之孝已昭格於有素大祀之殿配享之典原裁斷於宸衷眾議僉同神謀叶吉我陛下福壽康甯休徵畢集固足以驗在天之安享感格今方慶落成又議改造恐非所以爲昭事意營造之事在

官府視之似乎細小若不足惜而工役之興在小民之財則重爲勞費京師之一木民間之萬木也昔孔子作春秋凡宮室門觀臺園之作雖小必書重民力也魯人爲長府閔子騫曰仍舊貫如之何何必改作是聖賢垂訓無非欲戒興作以節省財力裕民人以保固邦本也況今上而天變災異頻仍星隕冰雹水旱蟲蝗奏告不絕內而樂平崇明盜賊依山據險僭稱偽號外而興師討罪有事於安南正百官羣工四方萬民獻謀建議輸忠決策以共濟時艱保安生靈以補報陛下之日大役疊興改造並見恐非力之所能及也且陛下正

欲清心寡慮內無紛雜外無勞擾以攝養真元保合太和兵荒盜賊必厘聖慮凡營造工役暫爲停息豈不可少免勤勞而得靜養之一端乎至安南之罪止因彼處自相禍亂失修享王之禮未敢侵害疆圉肆侮天朝其罪之應否寬宥師之量度進止彼地之生死存亡我民之勞逸休戚特在陛下一念之間一詔之發而已若各處盜賊誠爲可慮不過爲飢寒所迫一釜魚偷生旦夕計耳爲今欲行撲滅解散計亦無難惟陛下將此停罷大工所省財費遣官分賑下寬宥之詔許其解散自首卽爲良民而又免其賦稅徭役令得休息數年

賊盜平矣臣冒死上聞伏冀少霽天威鑒臣愚衷爲地方民病爲制治保安之道采擇施行天下幸甚生民幸甚疏上罷采木之役然竟以此忤用事者時崧祥年四十謝事旋里值歲大饑卽解帶鎔金購穀施賑鄉人稱之有解帶記初平汾晉閒山寇有靖晉錄備兵武定有鈞橋集皆士大夫頌美之辭也崧祥工書有臨十七帖草書石刻藏於家

江南通志並府志

陳鈇字公錫御史仕昭孫正德中進士授工部主事轉江西袁州府知府廉靜爲治不立赫赫名以母老告終養歸在鄉睦嫻任恤族黨稱之

府志

貴池縣志

卷三

人物志

官績上

十九

呂瑞字鳳儀正德元年歲貢任南京兵馬司指揮挾弊鈞慝不畏強禦武宗南征軍事旁午服勞而卒士夫賢之爭賻奠焉

萬曆府志

柯遷字瀛山正德十二年以貢生授江西彭澤知縣甫下車察奸吏數人置之法恤民病苦民大悅陞泉州府通判教民崇儉黜浮興文力學卒於官歸無長物人稱清白吏

府志

施幹字菊莊正德閒歲貢爲湖廣新甯知縣素性嫉惡有邪回者輒面斥不少假顏色時稱古直

府志

李廷臣性醇謹正嘉閒以國子生任棠邑知縣以廉潔著垂橐

而歸鍵戶林居郡守重之數舉鄉飲賓

府志

胡溥字元博正德戊辰貢生任江西上高主簿時宸濠作亂王守仁督兵豫章軍事旁午溥協理稱職守仁疏薦爲中貴所格時論惜之

以上漆志附新纂